

BEZaren armonizaziorako akordio politikoa lortu du EEEk

LUXENBURG

EEEko 12 lurraldeetako Ekonomia eta Hazienda ministroak 1993ko urtariletik aurrera zeharkako zergen (Balio Erantsiaren gaineko Zerga) armonizaziorako adostasun politiko batera iritsi ziren iragan astelehenean Luxenburg. Erresuma Batua izan ezik, gainontzeko 11 lurraldeek asmoa agertu dute hartutako akordioa ezinbestean bete beharreko EEEren direktiba edo lege batek arauturik izateko.

EEEko iturrien arabera, lege honen aurrean Britainia Handiak ez du ziurtatu baiezko botorik emango duenik, baina BEZ tipo arrunta % 15 azpitik ez jaisteko «konpromezu politikoa» hartu omen du britainiar ordezkariak.

EEEko Ekonomia eta Hazienda ministroak 1993tik aurrera zergak armonizatzeko akordioaren arabera, BEZ tipo arrunta % 15ekoa izango da eta, horrez gain, zenbait produktuentzako % 5eko zerga murriztua ere izango da. Azkenik, tabakoak, alkoholak eta erregaiek zerga bereziak izango dituzte.

EEEren lege hau aurtengo urrian bukatua izango dela aurrikusten da eta orduan jakingo da ziur Erresuma Batuak direktiba hau onartu edo blokeatu egingo duen. Britainiarrek diote, BEZaren armonizazioa merkatu legeek ezarri behar dutela eta ez EEEren agindu batek.

Astelehenean hartutako akordioaren arabera, Espainiak eta Luxemburgek BEZ tipo supermurriztuak ezarri ahal izango dituzte premiazko zenbait produktuen gainean —elikagaiak, eraikuntza, umeentzako jantziak eta abar—, akordioak tipo arruntaren igoera konpentsatu ahal izateko. Halaber, horrelakoxe produktuetarako '0' tipoa aplikatzen zutenek zerga horri eutsi ahal izango diote 1995ra arte, armonizazioa gauzatzen denean hain zuzen.

Tubacexek 1.375 milioi galdu ditu 1990etik aurtengo apirilera arte

Galerak konpentsatzeko 3.000 milioiko desinbertsioak egingo ditu

Hodiak produzitzen dituen Tubacex euskal enpresak 754 milioi pezeta galdu zituen 1990. urtean eta aurtengo lehenbiziko hiru hilabeteetan beste 620 milioi. Diru galera hauek nolabait konpentsatzeko, Tubacexeko zuzendariak enpresaren interesak salgai jarri eta desinbertsioak egiteko asmoa agertu zuten atzo.


BILBO

Iazko abuztutik aurtengo apirilera arte, guztira galdu dituen 1.374 milioiak nolabait konpentsatzearren, Tubacexek Estatu Batuetan dituen interes inmobiliarioak salgai jarriko ditu, Esteban Perez euskal konpainia honetako presidentek atzo jakin erazi zuenez. Operazio honen bidez 12 milioi dolar (1.300 milioi pezeta) lortzea espero dute. Horretaz gain, Madrilen duen merkatal zentru bat ere salduko du enpresak.

Salmenta hauekin, Tubacexek 2.550 eta 3.000 milioi pezeta bitartean eta dirutza horren % 50eko plusbalia lortzea espero duela esan zuen Perezek. Enpresa honek salgai ipiniko dituen beste interesen artean, Frantziako Vallourec enpresa siderurgikoan duen kapitalaren % 24,97 saltzea posibletzat jo zuen Esteban Perezek.

**ZIKLOAREN
BEHERALDIA
ABUZTUAN**

Iazko urteko emaitzei dagokienaz, Tubacexeko presiden-



Tubacexek Araban duen lantegia.

teak bi zati desberdin bereizi zituen. Lehenbizikoan, iazko abuztura arte, enpresak 271 milioi pezeta irabaziak zituen. Handik aurrera eta Pertsiar Golkoko gatazkaren ondorioz, ordea, merkatu eta prezioen erorialdia gertatu zen eta, honekin batera, dollarraren balioaren jaitsierak 1.025 milioi pezetako galera eragin zioten euskal enpresari. Iazko balantzeak, beraz, 754 milioiko galera erakutsi zuen.

Urte horretan zehar enpresaren fakturazioaren % 75 esportazioak izan ziren eta 18.691 milioi pezetara iritsi ziren.

Inbertsioen atalean, Tubacexeko presidentek EEBBtako Salem Tubes enpresan eskuratu duen par-

taidetza azpimarratu zuen. Amerikar konpainia hau hodi herdoilezinen sektoreko liderra omen da eta euskal enpresa honek kapitalaren % 20 eskuratu du 400 milioi pezetako inbertsioaz.

Halere, iazko joera negatiboak aurtengo lehenbiziko hiru hilabeteetan jarraitu du eta, Tubacexek 620 milioi galdu zituen. Dena dela, apiriletik aurrera egoera hau aldatu delako seinaleak daudela ziurtatu du Perezek, batez ere iragan maiatzean.

Aurtengo urteko balantzearen emaitza zelakoa izango den ezin jakin daitekeela esan zuen Perezek, baina aitortu zuenez, «pozik egongo ginateke urteko azken lau hilabeteetan irabaziak lortuko bagenitu».

EAEn 91.169 milioi pezeta gastatu ziren aseguru saritan 1990. urtean

V.P. / BILBO

Euskal Autonomi Elkarteak (EAE) 91.169 milioi pezeta (5.064,94 milioi libera inguru) gastatu ziren iaz aseguru saritan. Bizkaia izan zen aseguru konpainiek diru gehien bildu zuten herrialdea, 57.000 milioi pezeta (3.166,66 milioi libera) hain zuzen ere. Jarraian Gipuzkoa izan

zen saritan gehien gastatu zuena, 22.000 milioi pezeta (1.222,22 milioi libera) inguru, eta azkenik Araba, 11.700 milioi pezetarekin (650 milioi libera).

Aseguru produktuen kontsumitzaileek nahiago izan duten aseguru konpainia merkatuan esperientzia-duna, Espainiakoa, aukera ezberdinak eskaintzen dituen eta bankuren bati lotutakoa izan da.

Erakunde Aseguratzailen Institutu Kooperatiboak (ICEA) eginiko inkesta baten arabera, aseguru bezeroen % 35,6k lagun edo familiarterako norbaiten gomendioz kontratatzen ditu polizak eta % 49,2k erabaki pertsonalez egiten du.

Txostenean zehazten denez, kon-

tratazio hauen % 55 erakundean bertan gauzatzen dira eta % 43 aseguru agenteen bitartez.

Aseguru Kolegioen Euskal Kontseiluko lehendakaria den Luis Rey Suarezren esanetan, «iruzurrak eta gaizki ulertzeak ekiditeko modu egokiena kontratazio hauek profesional kualifikatuekin egitea da». Rey Suarezek bankuen menpe dauden aseguru erakundeekiko mesfidantza erakutsi zuen, «erakunde hauek beraien interesen gatibu bihurtzen bait dira» azpimarratuz.

Kontseiluko lehendakaria kezkatu agertu zen prestakuntzarik gabeko jendeak polizak saltzen dituelako, «hauek ez bait dute aseguruaren azalpen egokirik ematen».

LABURREAN

ESTATUAK INIren enpresak finantzatzeko ditu

Espainiako Industri Ministeritzak INIren enpresa batzuk finantzatzeko dituen Estatuako aurrekontu orokorren kontura. Enpresa hauen artean honako hauek daude: Hunosa, Bizkaiko Labe Garaiak, Acenor eta enpresa militar batzuk. Claudio Aranzadi ministroak esan duenez, «egoera ekonomikoak enpresa hauek Estatuarena aurrekontuetatik bereizteko zegoen plangintza atzera botatzera behartu gaitu».

UNTZIOLA publikoek 7.000 milioi galduko dituzte


Espainiako untziola publikoek 7.500 milioi pezeta galduko dituzte aurtengo. Galera hauekin, lantegi hauen defizitak gutxitzeko asmoak beteko dira. INIko arduradunen arabera, 1992. urterako Espainiako untziolen «emaitza positiboak izango dituzte». Aurrikuspen hauek jadanik eginda dagoen eskari karteran oinarritzen dira, aurtengoak 100.000 milioi pezetakoak izango dira eta, iazko 83.000 milioien aurrean.

ELAK % 5,65 hazi du afiliazioa bost hilabeteetan

ELA sindikatuak % 5,65eko hazkundera izan du urtearen lehen bost hilabeteetan afiliazioari dagokionez, sindikatu Batzorde Nazionalak adierazi zuenez. Hazkundera profesional federakunde ezberdinetan eta eskualdekako batzorde mailan ere nabaritu da.

OLARRA Ardotegiak bi domina lortu ditu Bordelen

Olarra Ardotegiko 'Cerro Añon Reserva 85' ardo beltzak eta 'Añares' ardo zuri sikuak urrezko eta zilarrezko dominak lortu dituzte Bordelen burutzen ari den 'Vinexpo' erakusketan. Olarra ardotegiak % 10 hazi zituen esportazioak iaz, 1.600.000 botila ardo salduz nazioarteko merkatuan.



EUSKAL KULTURAREN ALDIZKARI BERRIA